

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMÙTEÚ

Té Pāblú cādūha-dé tutú quíhĪⁿ ndaha té Timùteú

¹ Yúhú té Pāblú ní tendaha ñàha Yá Ndiõxí cáháⁿ-í tnúhu Xítohó Jesucristú núú ñáyiu chi ducaⁿ nĪ cachí Yă Ndiõxí cunduu, te ðiu-gá cúú-gă Yaá ní dácăcu nihnu ñaha xì-o núú ùhú núú ndàhú. Te tnàhá Xítohó Jesucristú ducaⁿ nĪ cachí-gá sá cáháⁿ-í tnúhu-gá, te ðiu-gá ní taxi-gá tnúhu ndee ìní xii-o sã cùndècu-o ndihĪ-gá ni caa ni quíhĪⁿ. ² Te yòhó té Timùteú cúú-n ĩⁿ tée ní sanu ichi ndisa-í ichi Xítohó Jesucristú chi ío váha ní sándáá ìní-n-gă. Te cādúha-í ĩⁿ tutú daquixi-í ndaha-n. Te xicáⁿ táhù-í núú Tătá-ó Dütú Ndiõxí ndihĪ núú Xítohó Jesucristú sá ío na chindee chítúu ñaha-gă xii-n, te ducaⁿ ndì nduú-gá ná cádá te ío váha cuu ìní-n cùndecu-n.

Cuèndá nchaa ñáyiu dândahú tnàha ñáyiu-xi

³ Te nàha-n nacuáa ní cáháⁿ-í cútnàhá ní quee-í ñúú Éfesú véxi-í distritú Macèdoniá, chi ní cachí-í sá quèndõ-o-n ñúú-áⁿ cáháⁿ-n dõho nchaa ñáyiu dândahú ñáhá cächí sá cáháⁿ tnúhu Yá Ndiõxí te ñá ndáá sá cáháⁿ-yu tnúhu-gá, te ðiu-ni ducaⁿ cáháⁿ-í vitna cada-n cùndecu-n. ⁴ Te cúñaha-n xìi-yu sá vă cádá cuèndá-yu nchaa cuèndú nihí-yu nàcuáa ní xóo cada ñáyiu ní xindecu ndéé sanaha, te nchaa cuèndú-áⁿ ðicó chínàá ñáhá-xí chi ñá túú vèdana

nàndíhi-xi, te ni ñà túú chindee ñaha-xi cada-o nacuáa cuíní Yă Ndiöxí, chi mee-ni sã quindáá iní-ó-gã quidé-xí quide-o nchaa nacuáa cuíní-gá.

⁵ Te duha càháⁿ-í cúñaha-n xì-yu cuendá sá ná cùu iní-yu tnàha ñáyíu-yu, te xìni ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yă Ndiöxí, te vá cání ìⁿ cani úú iní-yu, te núu ducaⁿ na càdá-yu te cuu iní ndisá-yu nchaa tnàha ñáyíu-yu. ⁶ Chi dava ñáyíu ñá túú-gã quidě-yu nchaa nàcuáa càháⁿ-í-a, chi mee-nă nchaa cuendá sá ñă túú vèdana nàndíhi xicáháⁿ-yu. ⁷ Te cuíní-yu cáháⁿ-yu nchaa tnúhu ní cáháⁿ ndíi Moisés dico ñá ndácũ-yu, chi cuèi ni yùhu ni iní-yu càháⁿ-yu dico ñá tècú tnùní-yu nàcuáa ní cáháⁿ ndíi, te ni tnúhu càháⁿ méě-yu ñá cútnùní iní-yu nàcuáa ndùu-xi.

⁸ Te sa nàha-o sá ncháá tnúhu ní cáháⁿ ndíi Moisés váha, te núu na tècú tnùní-ó nă cuendá ducaⁿ ní ngúndecu nchaa tnúhu-áⁿ. ⁹ Te cùtnuní iní-ó sã ñà díú sã cúú-xí nchàa ñáyíu quide váha ndècu ñuyíú-a ni ngúndecu nchaa tnúhu-áⁿ, chi ní ngúndecu-xi sá cúú-xí nchàa ñáyíu ñá túú quide váha, ndíhi cuendá nchaa ñáyíu ío sàá iní-xi, ndíhi cuendá nchaa ñáyíu quide cuehé quidé dùha, ndíhi cuendá nchaa ñáyíu ío ndècu cuéchi-xi, ndíhi cuendá nchaa ñáyíu ñá túú nèhe vèdana sá yíñùhu núú Yă Ndiöxí, ndíhi cuendá nchaa ñáyíu ñá túú càháⁿ váha cuendá ichi Yă Ndiöxí, ndíhi cuendá nchaa ñáyíu sàhni tátá-xi ndíhi năná-xi, ndíhi cuendá nchaa dava-gá ñáyíu sàhni tnaha, ¹⁰ ndíhi cuendá nchaa cue téé càháⁿ ndíhi ñáyíu dìhí te ñá díú ñàdihí-güedé cúũ-yu, ndíhi cuendá tucu nchaa ñáyíu dìhí càháⁿ ndíhi cue

tée te ñá díú yíi-yu cùu-güedé, ndihi cuendá nchaa cue tée càháⁿ ndihi tnàha ndi mee tée-xi, ndihi cuendá nchaa ñáiyu chíváha tnàha ñáiyu-xi cuendá sá cuíní-yu níhí-yu díhúⁿ, ndihi cuendá nchaa ñáiyu ndehnde, ndihi cuendá nchaa ñáiyu càcunehe ndée Yá Ndiõxí cuendá cuíní-yu cutnùní iní tnàha ñáiyú-yu sá càháⁿ ndáá-yu, te ñá ndáá sá càháⁿ ndáá-yu, ndihi cuendá nchaa ñáiyu quide nchaa dava-gá sá ñà túú tàuchiuⁿ Yá Ndiõxí cadá-yu. Cuendá nchaa ñáiyu ducaⁿ xíquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ìⁿ-ní cùu-xi ndihi nchaa tnúhu sá ñí cachí Yá Ndiõxí cáháⁿ-í, te tnúhu-áⁿ cúú-xí tnúhu váha vìhi, chi mee-gá ío váha iní-gá.

Té Păblú ndàcáⁿ táhú-dě núú Yá Ndiõxí sá ñí cundàhú iní ñáhá-gă xii-dé

¹² Te Xítohó Jesucrístú ní cutnùní iní-gá sá cadá ndáá-í cada-í nchaa chùⁿ tahu-gá. Te ndàcáⁿ táhú-í núú-gă sá ñí taxi-gá chùⁿ-gá quidè-í, te ío chìndee ñaha-gá xii-í. ¹³ Te ní taxi-gá chùⁿ-gá quidè-í cuèi ní xóo cáháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáiyu ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yá Ndiõxí xii-í, chi vátá quíndáá-gá iní-í Xítohó Jesucrístú cútnàhá ducaⁿ ñí xóo cada-í, te ñí ñá cutnùní iní-í nchaa sá quidè-í ní cùu, te cuèi ducaⁿ ñí xóo cada-í, ¹⁴ dico Yá Ndiõxí ío ní cundàhú iní ñáhá-gă xii-í te chìndee ñaha-gá. Te mee Xítohó Jesucrístú chíndèe ñaha-gá xii-í sàndáá iní-í-gá, te cùu iní-í nchaa tnàha ñáiyu-í.

¹⁵ Te ñihí-ó tnúhu sá Xítohó Jesucrístú ní quixi-gá ñuyúú-a cuendá sá dácăcu nihnu-gá nchaa ñáiyu ndècu ichi cuehé ichi duha. Te tnúhu-áⁿ cúú-xí

ìⁿ tnúhu ndáá, te xìni ñuhu-xi quindáá iní nchaa nchoo ñáyiú ndècu ñuyíú-a. Te yúhú cúú-í téé ío-gá ndécú cuèchi-xi núú Yá Ndiöxí ní cùu. ¹⁶ Te Yá Ndiöxí ní cundàhú iní ñáhá-gá ní dácácu nihnu ñaha-gá xii yúhú téé xidó ndécú cuèchi-xi ni cùu, cuendá cutnùní iní nchaa ñáyiú sá Xítóhó Jesucristú ío càhnu iní-gá. Te sá dúcáⁿ ñí quide ñaha-gá xii-í, te xiáⁿ cutnùní iní-yu sá nùu na quindáá iní ñáhá-yu xii-gá te cundecú-yu ndihí-gá ni caa ni quíhíⁿ. ¹⁷ Te nchaa-o chí ná càchí-ó sá ío càhnu cuu Yá Ndiöxí, te canehe-o sá yíñùhu núú-gá ni caa ni quíhíⁿ, chi mee-gá cúú-gá Yaá táxí tnùní nchaa nduu nchaa quíú. Te cùu-gá ìⁿ Yaá ñá túú xìní núú-ó, te ìⁿdii díí-ni-gá ío ndècu ndihí-gá nchaa sá xìní tnùní-gá.

¹⁸ Te yòhó té Timùteú téé cùu datná ìⁿ déhe mee-í sa nàha-n nacúáa ní cáháⁿ dava-gá cue téé càháⁿ tnúhu Yá Ndiöxí cuendá-n, te diu-ni ducaⁿ càháⁿ-ú tucu, te cada-n nchàa nacúáa càháⁿ tnúhu-áⁿ chi diu nchaa tnúhu-áⁿ canu ichi ñaha-xi xii-n cada-n nchaa nacúáa cuìní Yá Ndiöxí. ¹⁹ Te ío quindáá iní-n Xítóhó Jesucristú, te cada váha-n cùndecu-n nacúáa cundecu váha iní-n, chi dava ñáyiú ñá túú-gá ducaⁿ quidé-yu núu xiáⁿ ñá túú-gá sàndáá iní-yu nàcuáa càháⁿ tnúhu-gá. ²⁰ Te diu-ni ducaⁿ ñí quide té Himènéú ndihí té Lìjandrú ní dáñá ndèé-güedé ñá túú-gá sàndáá iní-güedé nàcuáa càháⁿ tnúhu Xítóhó Jesucristú, te ní xáhaⁿ-í xii-güedé sá ná cùndoho-ná-güedé nùu nása cada ñaha sàcuíhná xii-güedé, te ducaⁿ ñí xáhaⁿ-í cuendá sá vǎ càháⁿ cuèhé-gá-güedé cuendá Yá Ndiöxí.

2

Nàcuáa cáháⁿ ndihí-o Yă Ndiöxí

¹ Te na cächí tnúhu-í xii-n nchaa nacuáa cada-n. Te díhna-gá cächí tnúhu-í sá cáháⁿ ndihí-n Yă Ndiöxí cuendá nchaa ñáyiu te núu nása cùu xíndecú-yu, te cácaⁿ táhú-n núú-gă cuendá-yu, te ducaⁿ ío ndacaⁿ táhú-n núú-gă cuendá nchaa sá văha quide ñaha-gá xii-yu. ² Te ducaⁿ cáháⁿ ndihí-n Yă Ndiöxí cuendá nchaa cue tée cùnnu ndihí cuendá nchaa dava-gá cue tée cùchiuⁿ cuendá cada váha-güedé, te ducaⁿ nchòo ñá túú nă cuu cundecu-o, te ñá túú tnàhí ná caní iní-ó cùndecu-o, te ío cundecu yíñùhu-o núú Yă Ndiöxí, te cada-o nchaa nacuáa tàú-xi cunduu. ³ Te núu ducaⁿ na càda-o cáháⁿ ndihí-o Yă Ndiöxí cuendá nchaa ñáyiu te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. ⁴ Te mee-gă cuiní-gá sá ncháá ñáyiu tecú tnùní-yu nchaa tnúhu càháⁿ-gá, chi cuiní-gá sá nánihí tàhú-yu. ⁵ Te ìⁿ-ni Dútú Ndiöxí ndécú, te ìⁿ-ni Xítohó Jesucrístú, te medì-ni Xítohó Jesucrístú quidé-gă tnàhá tnúhu-o ndihí Yă Ndiöxí. ⁶ Te Xítohó Jesucrístú ní dáñá-gă méé-gă ní sahani ñaha-güedé xii-gá cuendá sá cuiní-gá sá căcu nihnu nchaa ñáyiu ndecu ñuyíú núú ùhú núú ndàhú. Te Yă Ndiöxí cuiní-gá sá ncháá ñáyiu ñuyíú ndécú vîtna níhí-yu tnúhu nàcuáa ní cuu ní xihí Xítohó Jesucrístú. ⁷ Te Yă Ndiöxí ní cachí-gá sá càháⁿ-í tnúhu-án ndèni ní cuu núú xíndecu ñáyiu ñá túú cùu ñáyiu isràél, te mee-ni tnúhu ndáá dánèhé-í-yu nàcuáa quindáá iní ñáhă-yu xii-gá, te yúhú càháⁿ ndáá-í sá Yă Ndiöxí ní cachí-gá sá càháⁿ-í tnúhu-gá chi ndècu ndihí-í Xítohó Jesucrístú, te ñá túú dândahú ñáhà-í xii-n.

8 Te yúhú cuení-í sá ncháá xìchi cáháⁿ ndihí cue téé Yá Ndiõxí, te na cùnduu ndoo cunduu nine iní-güedé òré ndonehe-güedé ndaha-güedé cáháⁿ ndihí ñaha-güedě xii-gá, chi vá cúú cùdééⁿ-güedě cuendá nchaa sá quidé ñàha ñáyiú xii-güedé, te ni vǎ cání iní-güedé cúcuèhé tnáhá-güedě ndihí-yu.

9 Te cǎchí tnúhu-í xii-n sǎ ncháá ñáyiú dǐhí ná cùnduu dío-yu nǎcuáa tàú-xi cunduu, te vá cùnduu cuehé cunduu duha dàtná cáá dǐo nchaa ñáyiú ndècu ichi cuehé ichi duha, te na ndàdá-yu díquǐ-yu nǎcuáa tàú-xi cunduu, te vá ndádá cuèhé ndada duhá-yu, te vá cání iní-yu cunduu víi-yu ndihí sá ïo ndèyáhu, te ni vǎ cání iní-yu cuihnú-yu dóó sǎ ïo ndèyáhu.

10 Te mee-ni sǎ vǎha cadá-yu, chi ducaⁿ tàú-xi cada nchaa ñáyiú dǐhí ndécú ichi Yá Ndiõxí.

11 Te òré tàcá-yu núú dǎcuàhá-yu tnúhu Yá Ndiõxí, te cue ñáyiú dǐhí-áⁿ na nǎhi dacuahá-yu tnúhu-gá, te cadá-yu nchaa nǎcuáa cǎháⁿ cue téé dàcuaha ñaha xii-yu tnúhu-gá.

12 Te yúhú cǎchí-í sá vǎ cúú dǎcuaha ñáyiú dǐhí cue téé, te ni vǎ cúú tàxi tnuní ñáhǎ-yu xii-güedé chi cunduu tnávíi-ni yuhú-yu cundedóho-yu.

13 Te ducaⁿ xini ñuhu-xi cadá-yu, chi Yá Ndiõxí ní cadúha-gá dǐhna-gá té Àdán te dǎtnùní ní cadúha-gá tá Èvá.

14 Te ñǎ díú mèe té Àdán ní dǎndáhú ñáhǎ sǎcuíhnǎ xii-dé, chi tá Èvá ní dǎndáhú-xi, te ñǎ túú ní quide váha-xi núú Yá Ndiõxí sá dúcáⁿ ñǎ sǎndáá iní-xi tnúhu ní cáháⁿ sǎcuíhnǎ-ǎⁿ.

15 Dico ñáyiú dǐhí ní nduu táhǔ-yu sá cóó dèhe-yu, te naníhí tàhú-yu te núú vá dáñǎ ndèe-yu canchicúⁿ nihnú-yu ichi Yá Ndiõxí, te cundecu yiñùhú-yu núú-gǎ, te cuu iní-yu nchaa

tnàha ñáyíu-yu, te cadá-yu nchaa nàcuáa tàú-xi cunduu cundecú-yu.

3

Nàcuáa tàú cue té yìndaha ñaha xii ñáyíu ndècu ichi Yá Ndiöxí cada-güedé

¹ Te ío ñⁿ tnúhu càháⁿ ñáyíu sá nõu ñⁿ té cuení quindaha ñaha xii ñáyíu ndècu ichi Yá Ndiöxí, te ñⁿ sá vâha cuení-dé cada-dé càchí-yu, te ndáá quée-xí tnúhu càháⁿ-yu. ² Te yúhú càchí-í sá cué té ducaⁿ na quindaha ñaha xii ñáyíu te xini ñuhu-xi cuu-güedé cue té quide ndáá cuendá sá vâ càháⁿ ñáyíu cuendá-güedé sá ñà túú quide ndáá-güedé. Te na cùu-güedé cue té ndèca ñⁿ caa-ni ñadihí, te na cùu-güedé cue té ñá túú quide cutexínu ndècu, te na cùu-güedé cue té quide nchaa nacuaa tàú-xi cunduu, te na cùu-güedé cue té sãñaha nõu vehe ndetatú nchaa ñáyíu ñuhu ichi, te na cùu-güedé cue té dânehé ñáhá vâha xii ñáyíu tnúhu Yá Ndiöxí. ³ Te vá cúú-güedé cue té quihu, te ni vâ cúú-güedé cue té ndècu pletú, te ni vâ cúú-güedé cue té dîcô-ni ducaⁿ ñihí dîhúⁿ, te ni vâ cúú-güedé cue té sâni iní nàá, te ni vâ cúú-güedé cue té ñuhu iní mee-ni dîhúⁿ. Chi na cùu-güedé cue té váha iní-xi te cunduu càhnu iní-güedé. ⁴ Te na cùu-güedé cue té ío váha sânu ichi ñadihí-xi ndihi landú-xi, te na cùu-güedé cue té quide nacuaa sândáá iní ñáhá landú-xi cuendá canehe-güexi sá yíñuhu núu-güedé. ⁵ Chi núu cùu-güedé cue té ñá ndácú cànuichi ñadihí-xi ndihi landú-xi, te vá ndácú-güedé quindaha-güedé cue ñáyíu ndècu ichi

Yá Ndiǒxí. ⁶ Te vá cúú-güedě cue téé íchí ni sàndáá iní-xi tnúhu Yá Ndiǒxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuíhná. ⁷ Te xìni ñuhu-xi cuu-güedé cue téé càháⁿ váha ñáyiú cuendá-xi, cuèi ñá díú ñáyiú ndècu ichi Yá Ndiǒxí cuendá sá vǎ cuátnùhu ñaha ñáyiú xii-güedé, chi núu ñáhá te cudana te sácuíhná quesaha-xi tàxi tnuní ñáhá-xí xii-güedé.

Cue téé chindee ñaha xii cue téé yìndaha ñaha xii ñáyiú ndècu ichi Yá Ndiǒxí

⁸ Te tnàhá cue téé chindee ñàha xii cue téé yìndaha ñaha xii ñáyiú ndècu ichi Yá Ndiǒxí xíní ñùhu-xi cuu-güedé cue téé quide nchaa nacúaa tàú-xi cunduu, te vá cúú-güedě cue téé càchí sá càháⁿ ndáá te ñá ndáá, te ni vǎ cúú-güedě cue téé quihu, te ni vǎ cúú-güedě cue téé sàni iní-xi dìcò-ni ùcaⁿ ñíhí dǐhúⁿ. ⁹ Te xìni ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiǒxí, te na cùu-güedé cue téé ío váha cùu iní-xi cuendá nchaa sá vǎha quide-güedé. ¹⁰ Te xìni ñuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedě cue téé yìndaha ñaha xii ñáyiú ndècu ichi Yá Ndiǒxí. ¹¹ Te tnàhá tucu nchaa ñáyiú dìhí ná càdá-yu nchaa nàcuáa tàú-xi cunduu, te vá cùndùu yiti yuhú-yu, te ni vǎ cúú-yu ñáyiú quide cutexínu ndècu, te na cùú-yu ñáyiú ío váha quide ndáá. ¹² Te nchaa cue téé chindee ñàha xii cue téé yìndaha ñaha xii ñáyiú ndècu ichi Yá Ndiǒxí, xìni ñuhu-xi cuu-güedé cue téé ndècu ñⁿ caa-ni ñadìhí-xi, te na cùu-güedé cue téé sànu

ichi váha ñadĩhí-xi ndihí landú-xi. ¹³ Te núu na càda ndáá-güedé chindee-güedě cue tée yĩndaha ñaha xii ñáyiú ndècu ichi Yá Ndiõxí, te canehé-yu sá yíñùhu núú-güedě, te ducaⁿ te vá cúú càháⁿ núú-güedě càháⁿ-güedé núú ñáyiú tnúhu Xítohó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiõxí

¹⁴ Te cuiní-í ndĩhí-ni quixi coto ñaha-ĩ xii-n dico díhna-gá cádũha-í tutú-a daquixi-í ndaha-n ¹⁵ chi na cuáháⁿ cuyaa-ĩ. Te xíaⁿ nõu càdũha-í tutú-a daquixi-í ndaha-n cuendá cutnùníní-n nãsa cada-n cùndecu-n ndihí nchaa ñáyiú ndècu ichi Yá Ndiõxí. Te ñáyiú-áⁿ cúũ-yu dàtná ñⁿ vehe cùu cuendá Yá Ndiõxí Yaá ndécú nchàa nduu nchaa quíú, chi ndècu ndihí ñaha-gá xii-yu, te cúú-yu ñáyiú càháⁿ váha cuendá tnúhu-gá. ¹⁶ Te cùtnuní ndáá iní-ó sã ïo càhnu cuu tnúhu càháⁿ Xítohó Jesucristú, tnúhu sá càháⁿ nàcuáa ndùu ichi ndecu-o, te duha càháⁿ tnúhu-áⁿ:

Te ní quixi Yá cúú Ndiõxí ñuyíú-a ní cuu-gá ñⁿ
ñáyiú,

te Espíritú Yá Ndiõxí ní càháⁿ ndáá-xi sá cúú-gã ñⁿ
Yaá ïo váha quide ndáá,

te cue espíritú xínú cuèchi núú Yá Ndiõxí ní xíní
ndáá-xi nchaa nàcuáa ní quide Yaá ní quixi
ñuyíú-a.

Te ní xité nuu tnúhu-gá ñihí ñuyíú-a,
te nděni ní cuu ní ngũíta-yu sàndáá iní ñáhã-yu
xii-gá,

te mee-gã cuánda-gá andiú.

Duha càchí tnúhu-áⁿ.

4

Ñáyiú daña nihnu vá quìndáá-gá iní-yu Yá Ndiöxí

¹ Te Espíritú Yá Ndiöxí càháⁿ ndáá-xi sá sàá nduu dàña nihnu dava ñáyiú ndècu ichi-gá vá quìndáá iní ñáhá-gã-yu xii-gá, te ducaⁿ chi cue espíritú cùndìhi yucu ñávãha dandàhú ñáhá-xí xii-yu, te mee-nã nchaa tnúhu càháⁿ nchaa ñáyiú cùndìhi nchaa espíritú-áⁿ cuhuⁿ iní-yu. ² Te nchaa ñáyiú ducaⁿ cùndìhi cue espíritú cùndìhi yucu ñávãha-áⁿ cúu-yu ñáyiú ío dandahú méé-xí chi càchí-yu sá càháⁿ ndáá-yu te ñá ndáá, te ñá túú tnàhí-gá ná quidé-xí iní-yu cuèndá nchaa sá cuèhé sá dúhá quidé-yu. ³ Te ñáyiú-áⁿ quesàhá-yu sá vã cúú càndeca tnaha ñáyiú, te ni vã cúú càxí-yu dava núú sã xini-yu caxí-yu, dico Yá Ndiöxí ní cadúha-gá nchaa sá nchító-ó cuèndá caxi-o, te cuini-gá sá ncháá nchò ñáyiú sàndáá iní tnúhu-gá ndacáⁿ táhú-ó núú-gã òré caxi-o. ⁴ Te nchaa sá ñí cadúha Yá Ndiöxí cúú-xí sã vãha te vá dáquèe tíhú-ó, te xini ñuhu-xi ndacáⁿ táhú-ó núú-gã cuèndá nchaa xíⁿ. ⁵ Te Yá Ndiöxí càchí-gá sá méé-gã quidé-gã cúú-xí sã vãha sá cúú-xí-ó te núu na ndàcáⁿ táhú-ó núú-gã.

Tée quide ndáá xínú cuèchi núú Xítohó Jesucristú

⁶ Te núu na dàcuaha-n ñáyiú ndècu ndihi-o ichi Xítohó Jesucristú nchaa nàcuáa càháⁿ-í-a ña, te cuu-n ìⁿ tée quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicúⁿ nihnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá. ⁷ Te vá cádá cuèndá-n nchàa cuendú cuèhé cuèndú duha càháⁿ

ñáyiú, ndìhi nchaa dava-gá cuèndú sá ñà túú nàndíhi cuendá sá ñà túú nă cumání-n cùndecu-n núú Yá Ndiöxí. ⁸ Te núú ìⁿ chiúⁿ cada-o te nàcaá luha yiqui-o te nàndíhi-xi luha, dico ío-gá nándíhi-xi te núú cada-o sã cùndècu yíñuhu-o núú Yá Ndiöxí. Te núú ducaⁿ na càda-o te cùu-xi ìⁿ sá vãha sá cúú-xí-ó vitna, te ni caa ni quíhíⁿ ducaⁿ cùu-xi ìⁿ sá vãha sá cúú-xí-ó. ⁹ Te xini ñuhu-xi sá ncháá-ndó quindáá iní-ndó nchaa tnúhu càháⁿ-í-a chi cùu-xi tnúhu ndáá. ¹⁰ Te vitna ío ndùcu ndee-o quide-o chiuⁿ Yá Ndiöxí Yaá ndécú nchaa nduu nchaa quíú te quide ndee iní-ó cuendá nchaa sá quidé ñàha ñáyiú xii-o, chi sàndáá iní-ó sã díú-gã chindèe ñaha-gá xii-o. Te nchaa ñáyiú cùndahú iní ñáhá-gã te chindèe ñaha-gá xií-yu, dico ñáyiú sàndáá iní ñáhá xii-gá ío-gá cùnùú-yu chindèe ñaha-gá xií-yu, chi dàcácu nihnu ñaha-gã núú ùhú núú ndàhú.

¹¹ Te nchaa tnúhu-áⁿ cùñaha-n xií-yu, te cáháⁿ-n dõho-yu sá ná càdá-yu nchaa nàcuáa càháⁿ-xi. ¹² Te ío cada váha-n cùndecu-n cuendá sá vã yõo daqueè tíhú ñáhá xii-n cuendá sá cúú-n tõe cuechi, te ío váha cada-n nchaa sá tàú-n càda-n cuendá ducaⁿ cànchicúⁿ nihnu nchaa ñáyiú ndècu ichi Yá Ndiöxí, te vii vii cáháⁿ ndìhí-n-yu, te cuu iní-n-yu, te ío quindáá iní-n Yá Ndiöxí, te mee-ni sã vãha cani iní-n, te ducaⁿ càda-n cuendá cànchicúⁿ nihnú-yu. ¹³ Te nini cùyaa-í quixi-í, te ío nducu ndèe-n cáháⁿ ndodo-n tnúhu Yá Ndiöxí núú-yu, te dacuahá-n-yu nàcuáa càháⁿ tnúhu-gá, te cáháⁿ-n dõho-yu nàcuáa cuu vii cuu váha iní-yu cundecú-yu ichi Yá Ndiöxí. ¹⁴ Te vá dáñá ndèe-n càda-n nacuáa ndùu táhú nĩ taxi Yá Ndiöxí ní ngúndecu ndìhi-n cùtnàhá ní

sacáⁿ ndodo cue téé yìndaha ñaha xii ñáyiú ndècu ichi Yá Ndiöxí ndaha-güedé díquí-n, te ní cachí tnúhu-güedé sá dúcáⁿ ní cuiní Yá Ndiöxí cunduu.

¹⁵ Te ní yùhu ní iní-n càda-n nchaa nacuáa càháⁿ-í-a cuèndá sá ná quìní ñáyiú sá ïo-gá váha ta quìde-n cuáháⁿ. ¹⁶ Te ío váha cundehe-n nchaa nacuáa quide-n, ndihí nchaa nàcuáa dānehé-n-yu, te vá dáñá ndéé-n dùcaⁿ cada-n. Te núu ducaⁿ na càda-n te nduu táhú-n cūndecu váha-n núú Yá Ndiöxí ní caa ní quíhíⁿ ndihí nchaa ñáyiú na tédóho nchaa tnúhu càháⁿ-n.

5

Nàcuáa tàú-xi cada-o cūndecu-o ndihí ñáyiú sàndáá iní tnúhu Yá Ndiöxí

¹ Te vá ténáa-n nchaa cue téé cūu sacuéhé chi vii vii cáháⁿ-n dōho-güedé, te cada iní-n sã dàtná tātá-n cūu-güedé, te diu-ni ducaⁿ vìi vii cáháⁿ-n dōho nchaa cue téé cuechi, te cada iní-n sã dàtná cue ñaní-n cūu-güedé. ² Te diu-ni ducaⁿ vìi vii cáháⁿ tucu-n dōho nchaa ñáyiú dīhí ñáyiú cūu sacuéhé, te cada iní-n sã dàtná náná-n cūú-yu, te diu-ni ducaⁿ vìi vii cáháⁿ tucu-n dōho nchaa ñáyiú dīhí ñáyiú cuechi, te cada iní-n sã dàtná cue cúha-n cūú-yu, te ío cuu váha iní-n òré ducaⁿ cāháⁿ-n dōho nchaa ñáyiú cuechi-ãⁿ.

³ Te canehe-n sã yíñùhu núú ñáyiú dīhí ní quendóo quèé, te chindéé-n-yu núu ndàhú-yu.

⁴ Te núu ìⁿ ñaha quèé ndécú cuè déhe-aⁿ àdi cue déhe ñani-aⁿ, te ío xìni ñuhu-xi cada-güexi nchaa nacuáa tàú-xi cunduu núú-aⁿ chi ducaⁿ cuiní Yá Ndiöxí cada-güexi. Te núu ducaⁿ na càda-güexi te nānchocáva-güexi quìde-güexi sá vāha sá cúú-xí

ñǎyiu ní dácuéhnú ñàha xii-güexi. Te núu ducaⁿ na càda-güexi te quède váha-güexi te ío nduu vétú iní Yǎ Ndiǒxí. ⁵ Te ñáyiu quèé ñáyiu ndàhú ndécú ìchi Yá Ndiǒxí sàndáá iní-yu sá díú-gǎ chíndèè ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihí ñàhá-yu xii-gá. ⁶ Te nchaa ñáyiu quèé cúdíí ìní quidé nchàa sá cuèhé sá dúhá cùú-yu dàtná ñáyiu ní xíhí cuèi ndècu vívǔ-yu. ⁷ Te cúñaha-n xii nchaa ñáyiu sá ná cádá-yu nchaa tnúhu càháⁿ-í-a cuendá sá ñà túú nǎ cumánǎ-yu cundecú-yu, te ducaⁿ vǎ yǒo càháⁿ cuèhé cuendá-yu. ⁸ Te ío xìni ñuhu-xi chindeé-yu cue tnàha ñáyíú-yu, dico ío-gá xíní ñuhu-xi chindeé-yu cue ñáyiu cùu ndi mee-yu ndècu ndihí-yu, te núu vá dúcáⁿ càdá-yu te ñá túú-gǎ sàndáá iní-yu cadá-yu nàcuáa càháⁿ Yǎ Ndiǒxí. Te sá dúcáⁿ ná càdá-yu te vihi-gá quidè-yu dàcúúxí ñáyiu ndècu ichi cuehé ichi duha.

⁹ Te chido tnùnì-n mèe-ni ñáyiu quèé ñáyiu sa ndècu únídico cuíá-xi àdi vihi-gá cuendá ñáyiu-áⁿ cadá-yu nchaa nàcuáa cuíní Yǎ Ndiǒxí núu nchàa ñáyiu ndècu ichi-gá, te ñáyiu-áⁿ xíní ñuhu-xi cuú-yu mee-ni ñáyiu ní quide ndáá ní xindecu ndihí yǎ-xi. ¹⁰ Te na cùú-yu ñáyiu quèé quidé vǎha cùú-yu núu nchàa ñáyiu, te na cùú-yu ñáyiu quèé xíní canu ichi váha cue landú-xi, te na cùú-yu ñáyiu sǎñaha nùu vehe ndetatú cue ñáyiu ñuhu ichi, te na cùú-yu ñáyiu ndècu túha quède náni chùuⁿ cuendá cue ñáyiu ndècu ichi Yá Ndiǒxí, te na cùú-yu ñáyiu chindee nchaa ñáyiu ndècu ndihí tnúndòho tnúhu ndàhú, te na cùú-yu ñáyiu ñá túú dàña ndeé quidé nchàa núu sǎ vǎha.

¹¹ Te vá chídó tnùnì-n ñáyiu quèé ñáyiu ñá túú

ndècu únídico cuíá-xi cada chiùⁿ Yá Ndiöxí, chi núu cuechi-gă-yu ña, te vá cündăá-yu cadá-yu chiùⁿ-gá, chi quesàhá-yu natnándaha tucú-yu. ¹²Te sá cuendá xǎⁿ te nacháhu-yu núu Yă Ndiöxí, chi vá cadá-gă-yu năcuáa ní cuu tnúhu cadá-yu ni cùu. ¹³Te ngúíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñáyiú ducaⁿ quide ío cùu cuhndú-yu, te cùyiti yuhú-yu, te ndéni ní cuu cuháⁿ-yu chinee díquǐ-yu vehe tnàha ñáyiú-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñà túú nàndíhi. ¹⁴Núu xǎⁿ cuiní-í sá ncháá ñáyiú quée ñáyiú cuechi na nàtnándaha tucú-yu cuendá cuú-yu năná, te ducaⁿ càdá-yu nchaa sá xíní ñùhu-xi cadá-yu vehé-yu, te núu ducaⁿ na càdá-yu, te nchaa ñáyiú cùu úhú iní ñáhá xì-o vá nihí-gá-yu tnúhu cáháⁿ cuèhé-yu cuendá tnúhu Yá Ndiöxí. ¹⁵Te dava ñáyiú quée ndécú ìchi Yá Ndiöxí ní cùu ní dáñă-yu te ní tñí-yu tnúhu càháⁿ sácuíhná.

¹⁶Te núu dava ñáyiú ndècu ìchi Yá Ndiöxí ndécú ndíhí-yu ìⁿ ñaha quée cúú ndí meé-yu ña, te tàú-yu chindee ñàhá-yu xii-aⁿ cuendá sá vǎ ío chi chiùⁿ-aⁿ nchaa ñáyiú ndècu ìchi Yá Ndiöxí, te ducaⁿ te nchaa ñáyiú ndècu ìchi-gá-áⁿ ñíhí ndéé-gă-yu chindèé-yu dava-gá ñáyiú quée ñá túú vèdana ndècu ndíhi.

¹⁷Te nchaa cue téé ío váha quide yíndaha ñaha xii ñáyiú ndècu ìchi Yá Ndiöxí ío xìni ñùhu-xi canehe sá yíhí ñùhu núú-güedě, te chindee ñàha xii-güedé. Te uuⁿ-gá tàú ñáyiú ducaⁿ càdá-yu sá cúú-xí nchaa cue téé ni yùhu ni iní càháⁿ tnúhu-gá. ¹⁸Te núu tùtú Yă Ndiöxí càchí-xi: “Vá chíhí-ndó ñunu yuhu ndicutu oré dánchezí-dí triú”, duha càchí-xi.

Te càchí tucu-xi ìngá xichi: “Ìíⁿ téé quède chiuⁿ dacuítíí tàú-xi sá cùhúⁿ yãhu-dé”, duha càchí-xi núú tütú-gá.

¹⁹ Te núú íó ñáyiú véxi sàcáⁿ cuéchi núú-n cuendá ìíⁿ téé yìndaha ñaha xii ñáyiú ndècu ichi Yá Ndiòxí ñá, te cada cuendá-n tnũhu càháⁿ-yu te núú véxi-yu ndihí úú àdi úní ñáyiú càháⁿ ndáá nàcuáa ní cuu, áⁿ nũu ñáhá te vá cádá cuendá-n tnũhu càháⁿ-yu.

²⁰ Te núú cue téé yìndaha ñaha xii ñáyiú-áⁿ ndécú cuéchi-güedé, te cáháⁿ-n dõho-güedé núú nchàa ñáyiú ndècu ichi-gá cuendá sá dává-gã-yu vá cúyíí-yu ducaⁿ càdá-yu. ²¹ Te Yá Ndiòxí ndihí Xítóhó Jesucristú náhá-gã ndihí cue espíritú xínú cuéchi núú-gã sá yũhú càháⁿ-í dõho-n sã cádá-n nchàa nacuáa càháⁿ-í-a, te ìíⁿ-ni càháⁿ ndihí-n cuè téé xìní tnáhá ndihí-n, ndihí cue téé ñá túú xìní tnáhá ndihí-n. ²² Te vá ìo cundihí iní-n tàxi ndecu-n ìíⁿ téé quindaha ñaha xii ñáyiú, chi díhna-gá cada cuendá-n te núú cùu-dé ìíⁿ téé quède ndáá, chi núú cuendá-ni na tàxi ndecu-n-dé te vá cádá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mèe-n vá cádá-n nì ìíⁿ sá cuèhé sá dúhá.

²³ Te ducaⁿ ìo mee-ni cùhú xití-n te vá cóhó-n mèe-ni ndute, chi tnáhá luha vìnú ndéhé yoho yàha stilé coho-n cuendá cada tátna-xi.

²⁴ Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuéchi-yu te dàvá-áⁿ cutnùnì. ²⁵ Te ducaⁿ sãtnahá-xi cùu nchaa sá vãha quède davá-yu chi cùtnuní, te

cuëi ñá túú cùtnuní òré-ni dico dacuítí sǎ sàá nduu cùtnuní.

6

¹ Te nchaa ñáyiú ndècu tnuú quidé chiún ndihí ìíⁿ patróón xìnì ñuhu-xi ío canehé-yu sá yíñùhu núú-dě cuendá sá vǎ cǎháⁿ cuèhé ñáyiú cuendá Yǎ Ndiǒxí, te ni vǎ cǎháⁿ cuèhé-yu cuendá tnúhu-gá. ² Te núú patróón cue ñáyiú xínu cuechi-áⁿ sàndáá iní-dé Yǎ Ndiǒxí, te ñá díú sǎ dúcáⁿ sàndáá iní-dé Yǎ Ndiǒxí te vá cǎnehé-yu sá yíñùhu núú-dě, chi uuⁿ-gá tàú-yu cada váha-yu cunu cuèchí-yu núú-dě, te ducaⁿ na cǎdá-yu chi xínu cuechí-yu núú tēe sàndáá iní ndihí-yu tnúhu Yá Ndiǒxí. Te vá dáñá ndéé-n dànehé-n-yu nchaa nàcuáa cǎháⁿ-í-a, te cúñaha-n xii-yu sá ná cǎdá-yu.

Nduu vétú iní-ó cùndecu-o

³ Te ío cue tée ñá túú tñì-güedé nàcuáa cǎháⁿ tnúhu Xítóhó Jesucristú, te cue tée-áⁿ cǎchí-güedé sá cǎháⁿ ndáá-güedé dico ñá ndáá, chi ñá túú cǎháⁿ-güedé nàcuáa cuáháⁿ tnúhu-gá. Te nchaa tnúhu Xítóhó Jesucristú cúú-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue tée ducaⁿ xǐquide quide cahnu-güedé méé-güedě dico ñá túú vèdana xìní-güedé, te cue tée-áⁿ ñá túú ndècu váha iní-güedé chi nándi tnúhu sá ñá túú nàndihí cuíní-güedé cútnàha-güedé. Te ngüita-güedé cúú cuèdú iní tnáhá-güedé, te nàá ndihí tnáhá-güedé, te xǐcuèhé tnáhá-güedé, te ñá túú-gǎ cúú váha iní núú tnáhá-güedé. ⁵ Te cue tée-áⁿ mee-ni nàá-güedé chi ñá túú sàni váha iní-güedé, te ni ñá túú xìní-güedé nàcuáa cuáháⁿ

tnúhu ndáá tnúhu Yá Ndiǒxí, te cächí-güedé sá ïo váha cundecu-güedé ichi-gá chi sàni iní-güedé sá ïo vài díhúⁿ ñhí-güedé cundecu ndíhi-güedé. Te yúhú cáháⁿ-í dóho-n sǎ vǎ ñihí tnáhá-n ndíhi nchaa cue téé ducaⁿ xǐquide. ⁶ Te ndáá sá ïchi Yá Ndiǒxí cúú-xí ìⁿ ichi sá ïo váha cundecu-o, dico xìni ñuhu-xi nduu vétú iní-ó nàcuáa ndècu-o ñuyíú-a. ⁷ Te nchoo cuè ñáyiu chi ñá túú vèdana nèhe-o ní quexio ñuyíú-a, te dǐu-ni ducaⁿ ñà túú vèdana canehe-o quǐhíⁿ òré ná cùú-ó. ⁸ Te ío xìni ñuhu-xi nduu vétú iní-ó te núu ndècu-ni sá cúnchìto-o ndíhi dóó cuihnu-o. ⁹ Te ío ñáyiu ío cuíní-yu cuu cuicá-yu, te ñáyiu-áⁿ dácàhu iní ñáhá yùcu ñávàha xí-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidé-yu, te nchaa sá quidè-yu-áⁿ ñà túú vèdana nándíhi-xi chi uuⁿ-gá ndádá ndàhú ñáhá-xí xì-yu, te dàcuíta nihnu ñaha-xi. ¹⁰ Chi nchaa ñáyiu ñùhu iní mee-ni díhúⁿ, te xǐáⁿ quidé-xí ngüíta-yu sàni iní-yu cadá-yu nándi sá cuèhé sá dúhá. Te ío ñáyiu ndècu ichi Yá Ndiǒxí te sá tnúhu ducaⁿ ñùhu iní mee-ni díhúⁿ ñí dáñǎ-yu ñá túú-gǎ sàndáá iní ñáhǎ-yu xii-gá, te vitna ñá túú tnàhí-gá ndécú vǎha iní-yu.

Cahni iní-ó càda-o nchaa nacuáa cáháⁿ Yǎ Ndiǒxí chi sàndáá iní-ó-gǎ

¹¹ Te yòhó téé quide chiuⁿ Yá Ndiǒxí xìni ñuhu-xi vá cadá-n dàtná quidé nchàa ñáyiu ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nàcuáa nduu vétú iní Yá Ndiǒxí, te ío quíndáá iní-n-gǎ, te cuu iní-n nchàa tnaha ñáyiu-n, te cada càhnu iní-n nchàa sá ná yǎha-n cùndecu-n ichi-gá, te cunduu ndàhú iní-n.

12 Te cahni iní-n càda-n nchaa nacuáa cuení Yă Ndiöxí chi sàndáá iní-n-gă, te ío cuhuⁿ iní-n sã cùndècu-n ndihì Yă Ndiöxí ni caa ni quíhíⁿ, chi diu cuendá tnahí-áⁿ nì cáháⁿ ñáhá-gă xii-n, te ní cáháⁿ ndáá-n nũú vâi ñáyiú sá ïo váha sàndáá iní-n-gă. 13 Te Yă Ndiöxí Yaá quidé nchìto nchaandi túhú sá ïo ñuyíú nàha-gá sá càháⁿ-í dóho-n vitna, te diu-ni ducaⁿ nàha tucu Xítohó Jesucristú Yaá ní cáháⁿ tnúhu ndáá núú tẽ Pilatú 14 sá quindáá iní-n càda-n nchaa nacuáa càháⁿ Yă Ndiöxí, te nchaa tnúhu càháⁿ-gá cada-n nàcuáa vá dáquèe tíhú ñáhá ñáyiú xii-n, te ducaⁿ-ni càda-n ndéé ná sáá nduu quixi tucu Xítohó Jesucristú. 15 Te quixi tucu-gá chi ducaⁿ ñi cachí Yă Ndiöxí cunduu, te mee Yă Ndiöxí náhá-gă ná nduu quixi tucu Xítohó Jesucristú. Te Yă Ndiöxí ío váha cùu iní-gá te ìⁿndi díi-ni-gă ío-gá cùnùu-gá dàcúúxí cuè téé tàxi tnuní ìⁿ ìⁿ nacióⁿ ndihì nchaa dava-gá cue téé cùnùu, chi tàxi tnuní ñáhá-gă xii-güedé, te nchaa ñáyiú ndècu ñuyíú-a tàxi tnuní-gá. 16 Te diu-gá cúú-gă Yaá ndécú nchaa nduu nchaa quíú, te ío càhnu cuu-gá chi dàtná dáyèhé nchícanhii dàyehé-xi núú ndécú-gă, te vá yõ ìⁿ cùyì dayatni núú ndécú-gă, te ni ñă túú nì ìⁿ ñáyiú xìní ñáhá xì-gá te ni vâ ndácũ-yu quiní ñáhã-yu xii-gá. Te ío na cànehe nchaa ñáyiú sá yíñùhu núú-gă ni caa ni quíhíⁿ, te ducaⁿ ïo na tàxi tnuní-gá ni caa ni quíhíⁿ. Te ducaⁿ na cùnduu.

17 Te cáháⁿ-n dôho nchaa ñáyiú cuica ndècu ndihì nchaa sá ïo ñuyíú-a cuendá sá vâ cádá càhnú-yu mée-yu, te duuⁿ duuⁿ vá cùndèé iní-yu ni ìⁿ sá ndécú ndihí-yu chi vá cúdíi-xi, te cáháⁿ-n dôho-yu sá ná cùndeé iní-yu Yă Ndiöxí chi diu-gá cúú-gă Yaá

ndécú nchàa nduu nchaa quíú, te chitu núú ndáhá tàxi-gá nchaa sá xíní ñùhu-o, chi cuení-gá sá ïo cuu váha iní-ó cùndecu-o. ¹⁸ Te cáháⁿ tucu-n dõho-yu sá ná càdá-yu mee-ni sã vãha, te cuendá nchaa sá vãha cadá-yu-áⁿ te cuú-yu ñⁿ ñáyiu cuica sã cúú-xí Yã Ndiõxí, te na cùndecu túha-yu chindèé-yu cue ñáyiu ndàhú cuãñàhá-yu sá xíní ñùhú-yu. ¹⁹ Te núu ducaⁿ na càdá-yu te Yá Ndiõxí cuãñaha-gã sá ndúú tãhũ-yu na sàá nduu, te ngúndecu váha-yu ndihí-gá ni caa ni quíhíⁿ.

Tnúhu ndéé núú ñí ndihí-ná

²⁰ Te yòhó té Timùteú càháⁿ-í dóho-n sã ïo cada cuendá-n vã dãma tnúhu ní taxi Yá Ndiõxí danèhé-n ñáyiu, te vá cadá cuendá-n nchàa cuendú cuèhé cuendú duha ío ñuyíú-a chi ñá túú nàndíhí-xí, te ni vã cadá cuendá-n nchàa tnúhu xítnàha ñáyiu càchí sá xícá naha tnúhu cue téé túha chi ñá díú ñⁿ tnúhu ndáá cúú-xí. ²¹ Te ío ñáyiu ñá túú-gã sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiu-áⁿ.

Te Yá Ndiõxí ná chìndee chítúu ñaha-gã xii-n. Te ducaⁿ na cùnduu. Te ío cada ndee ìní-nã vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939